



Sud Bosne i Hercegovine
Суд Босне и Херцеговине

Broj: S1 3 Iž 043696 22 Iž
Sarajevo, 18.08.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović predsjednika vijeća, Vesna Trifunović i Dinke Bešlagić-Čovrk članova vijeća, odlučujući o žalbi Vahida Omanovića iz ..., izjavljenoj protiv odluke Centralne izborne komisije Bosne i Hercegovine broj: 06-01-07-3-1050/21 od 02.06.2022. godine o utvrđivanju odgovornosti za kršenje odredbi Izbornog zakona BiH, u nejavnoj sjednici održanoj dana 18.08.2022. godine, donio je

RJEŠENJE

Žalba se odbija.

Obrazloženje

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je Vahid Omanović odgovoran što u 2020. godini nije Centralnoj izbornoj komisiji BiH podnio izvještaj o imovnom stanju u roku od 30 dana od dana prestanka mandata, čime je prekršio odredbu člana 15.8 stav 2 Izbornog zakona, te mu je na osnovu člana 6.7 stav 1 tačka 1 i 19.10 stav 1 tačka b) Izbornog zakona izrečena novčana kazna u iznosu od 500,00 KM.

Protiv ove odluke Vahid Omanović blagovremeno je podnio žalbu navodeći da je smatrao da nije obavezan popuniti imovinski karton i da je novčana kazna previsoko odmjerena cijeneći da prima penziju u iznosu od 396,00 KM.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je uvidom u službenu evidenciju utvrdila da je žalitelju Vahidu Omanoviću prestao mandat

vijećnika u Opštinskom vijeću Ključ i da nakon isteka mandata, do 15.12.2020. godine, nije podnio izvještaj o imovnom stanju.

Navedeno je bilo osnov da Centralna izborna komisija BiH, po službenoj dužnosti, Zaključkom broj 06-1-07-3-1250/21 od 15.12.2021.godine, pokrene postupak utvrđivanja odgovornosti žalitelja, zbog kršenja odredbe člana 15.8 stav 2 Izbornog zakona BiH, u kom postupku žalitelj, i ako uredno pozvan, nije dostavio izjašnjenje.

Izborni zakon Bosne i Hercegovine u odredbi člana 15.8 stav 2 propisuje obavezu izabranim članovima organa vlasti na svim nivoima da u roku od 30 dana od prestanka mandata na koji je izabran, Centralnoj izbornoj komisiji BiH podnese izvještaj o imovnom stanju. Radi se o imperativnoj zakonskoj normi, koja mora biti poznata izabranom članu organa vlasti i stoga ukazivanje žalbe da žalilac za ovu obavezu nije znao ne eksculpira ga od odgovornosti za postupanje protivno zakonu.

Odlučujući o visini novčane kazne za povredu zakona za koju je žalitelju utvrđena odgovornost Centralna izborna komisija BiH pravilno je primjenila odredbu člana 19.10. Izbornog zakona BiH. Citirana odredba za navedene prekršaj propisala je novčanu kaznu u rasponu od 300,00 do 3.000,00 KM, a žalitelju je odmjerena novčana kazna od 500,00 KM. Prilikom izricanja novčane kazne veće od zakonskog minimuma cijenjeno je da je žalitelj kao izabrani član organa vlasti bio dužan upoznati se sa zakonskim odredbama koje regulišu obavezu izabranih kandidata, kao i činjenicu da žalilac neodazivanjem na pozive i nedostvaljanjem izjašnjenja izbjegavao saradnju sa Centralnom izbornom komisijom BiH. Pored navedenih okolnosti cijenjeno je da žalitelj nije ranije kažnjavan i time su, prema zaključku Apelacionog vijeća, raspravljene sve okolnosti relevantne za izricanje adekvatne sankcije.

Na osnovu iznesenog zaključeno je da je visina novčane kazne pravilno odmjerena i da na pravilnost odluke nemaju uticaja navodi žalbe o visini primanja žalitelja za koje navode nisu ni priloženi relevantni dokazi.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
SUDIJA
Zvezdana Antonović